

史記

人物全傳

[4]

「紀傳版二十六史」 國學網精校本

「西漢」 司馬遷 撰



北京时代华文书局

史記

人物全传

[4]

列传〔下〕

〔纪传版二十六史〕 国学网精校本

〔西汉〕司马迁撰 周殿富主编 尹小林点校



北京时代华文书局

图书在版编目 (CIP) 数据

史记人物全传 / (西汉) 司马迁撰. — 北京 : 北京时代华文书局, 2013. 12
(纪传版二十六史 / 周殿富主编)
ISBN 978-7-80769-198-3

I. ①史… II. ①司… III. ①中国历史—古代史—纪
传体 IV. ①K204.2

中国版本图书馆 CIP 数据核字 (2013) 第 293923 号

【纪传版二十六史】

史记人物全传

[西汉] 司马迁 / 撰

出 版 人 田海明 周殿富
主 编 周殿富 副 主 编 尹小林
执行主编 武 学 点 校 尹小林
责任编辑 宋 春 张 原 侯娟雅 张艳玲
特约编辑 李 莉 马小奔 李广超 孙懿新
装帧设计 张亚力 迟 稳
发行总监 张国平 营销总监 赵秀彦
责任印制 刘 银 范玉洁
出 版 时代出版传媒股份有限公司 <http://www.press-mart.com>
北京时代华文书局 <http://www.bjsdsj.com.cn>
北京市东城区安定门外大街 136 号皇城国际大厦 A 座 8 楼 邮编: 100011
发 行 北京时代华文书局图书发行部 (010) 64267120 64267397
印 制 北京亚通印刷有限责任公司 (010) 52891770
规 格 710mm×1000mm 1/16
印 张 114.75
字 数 1228 千字
版 次 2014 年 3 月第 1 版 2014 年 3 月第 1 次印刷
书 号 ISBN 978-7-80769-198-3
定 价 148.00 元 (全四册)

目 录

第四卷·列传

卷一百·季布 栾布	1349
卷一百一·袁盎 晁错	1355
卷一百二·张释之 冯唐	1365
卷一百三·万石君 石建 石庆 卫绾 直不疑 张叔	1374
卷一百四·田叔 田仁 任安.....	1383
卷一百五·扁鹊 仓公淳于意	1390
卷一百六·吴王刘濞.....	1417
卷一百七·魏其侯窦婴 武安侯田蚡 灌夫.....	1430
卷一百八·韩安国.....	1444
卷一百九·李广 李陵	1451
卷一百十·匈奴.....	1460
头曼单于 / 冒顿单于 / 老上稽粥单于 / 军臣单于 伊稚斜单于 / 乌维单于 / 乌师庐单于 / 响犁湖单于 且鞮侯单于	
卷一百十一·卫将军骠骑.....	1492

卫 青 / 霍去病 / 公孙贺 / 李 息 / 公孙敖
 李 沮 / 李 蔡 / 张次公 / 苏 建 / 赵 信
 张 骞 / 赵食其 / 曹 襄 / 韩 说 / 郭 昌
 荀 彘 / 路博德 / 赵破奴

卷一百十二·平津侯公孙弘 主父偃 徐乐 严安 … 1512

卷一百十三·南越…………… 1526

南越王尉佗

卷一百十四·东越…………… 1535

闽越王无诸 / 越东海王摇

卷一百十五·朝鲜…………… 1540

朝鲜王满 / 孙右渠

卷一百十六·西南夷…………… 1545

卷一百十七·司马相如…………… 1551

卷一百十八·淮南厉王刘长 淮南王刘安 衡山王刘赐
 …………… 1609

卷一百十九·循吏…………… 1628

孙叔敖 / 子 产 / 公仪休 / 石 奢 / 李 离

卷一百二十·汲黯 郑当时 …………… 1632

卷一百二十一·儒林…………… 1640

申 公 / 辕固生 / 韩 生 / 伏 生 / 兒 宽
 徐 生 / 董仲舒

卷一百二十二·酷吏…………… 1651

郅 都 / 宁 成 / 周阳由 / 赵 禹 / 张 汤
 义 纵 / 王温舒 / 尹 齐 / 杨 仆 / 减 宣 / 杜 周

卷一百二十三·大宛····· 1670

卷一百二十四·游侠····· 1690

朱 家 / 田 仲 / 剧 孟 / 郭 解

卷一百二十五·佞幸····· 1697

邓 通 / 周文仁 / 韩 嫣 / 李延年

卷一百二十六·滑稽····· 1701

淳于髡 / 优 孟 / 优 旃 / 郭舍人 / 东方朔
 卫 青 / 西门豹

卷一百二十七·日者····· 1716

卷一百二十八·龟策····· 1722

卷一百二十九·货殖····· 1745

范 蠡 / 子 赣 / 白 圭 / 猗 顿 / 乌氏倮
 蜀卓氏 / 程 郑 / 宛孔氏 / 曹邴氏 / 刀 间
 师 史 / 宣曲任氏 / 无盐氏

卷一百三十·太史公自序····· 1769

季布 栾布

季布者，楚人也。为气任侠^①，有名于楚。项籍使将兵，数窘汉王^②。及项羽灭，高祖购求布千金，敢有舍匿，罪及三族。季布匿濮阳周氏。周氏曰：“汉购将军急，迹且至臣家，将军能听臣，臣敢献计；即不能，愿先自刭。”季布许之。乃髡钳季布，衣赭衣，置广柳车中^③，并与其家僮数十人，之鲁朱家所卖之。朱家心知是季布，乃买而置之田。诫其子曰：“田事听此奴，必与同食。”朱家乃乘轺车^④之洛阳，见汝阴侯滕公。滕公留朱家饮数日。因谓滕公曰：“季布何大罪，而上求之急也？”滕公曰：“布数为项羽窘上，上怨之，故必欲得之。”朱家曰：“君视季布何如人也？”曰：“贤者也。”朱家曰：“臣各为其主用，季布为项籍用，职耳。项氏臣可尽诛邪？今上始得天下，独以己之私怨求一人，何示天下之不广也！且以季布之贤而汉求之急如此，此不北走胡即南走越耳。夫忌壮士以资敌国，此伍子胥所以鞭荆平王之墓也。君何不从容为上言邪？”汝阴侯滕公心知朱家大侠，意季布匿其所，乃许曰：“诺。”待间，果言如朱家指。上乃赦季布。当是时，诸公皆多季布能摧刚为柔，朱家亦以此名闻当世。季布召见，

谢，上拜为郎中。

①【集解】孟康曰：“信交道曰任。”如淳曰：“相与信为任，同是非为侠。所谓‘权行州里，力折公侯’者也。”或曰任，气力也；侠，俌也。【索隐】任，而禁反。侠音协。如淳曰“相与为任，同是非为侠，权行州里，力折公侯者”，其说为近。俌音普丁反，其义难喻。②【集解】如淳曰：“窘，困也。”③【集解】服虔曰：“东郡谓广轍车为‘柳’。”邓展曰：“皆棺饰也。载以丧车，欲人不知也。”李奇曰：“大牛车也。车上覆为柳。”瓚曰：“茂陵书中有广柳车，每县数百乘，是今运转大车是也。”【索隐】案：服虔、臣瓚所据，云东郡谓广轍车为广柳车，及茂陵书称每县广柳车数百乘，则凡大车任载运者，通名广柳车，然则柳为车通名。邓展所说“柳皆棺饰，载以丧车，欲人不知也”，事义相协，最为通允。故《礼》曰“设柳翣，为使人勿恶也”。郑玄注《周礼》云“柳，聚也，诸饰所聚也”。则是丧车称柳，后人通谓车为柳也。④【集解】徐广曰：“马车也。”【索隐】案：谓轻车，一马车也。

孝惠时，为中郎将。单于尝为书嫚吕后，不逊，吕后大怒，召诸将议之。上将军樊哙曰：“臣愿得十万众，横行匈奴中。”诸将皆阿吕后意，曰“然”。季布曰：“樊哙可斩也！夫高帝将兵四十余万众，困于平城，今哙奈何以十万众横行匈奴中，面欺！且秦以事于胡，陈胜等起。于今创痍未瘳，哙又面谀，欲摇动天下。”是时殿上皆恐，太后罢朝，遂不复议击匈奴事。

季布为河东守，孝文时，人有言其贤者，孝文召，欲以为御史大夫。复有言其勇，使酒难近^①。至，留邸一月，见罢。季布因进曰：“臣无功窃宠，待罪河东^②。陛下无故召臣，此人必有以臣欺陛下者；今臣至，无所受事，罢去，此人必有以毁臣者。夫陛下以一人之誉而召臣，一人

之毁而去臣，臣恐天下有识闻之有以闕陛下也^③。”上默然惭，良久曰：“河东吾股肱郡，故特召君耳。”布辞之官。

①【索隐】使音如字。近音其靳反。因酒纵性谓之使酒，即酗酒也。②【索隐】季布言己无功能，窃承恩宠，得待罪河东。其词典省而文也。③【集解】韦昭曰：“闕见陛下深浅也。”

楚人曹丘生，辩士，数招权顾金钱^①。事贵人赵同等^②，与窦长君善。季布闻之，寄书谏窦长君曰：“吾闻曹丘生非长者，勿与通。”及曹丘生归，欲得书请季布^③。窦长君曰：“季将军不说足下，足下无往。”固请书，遂行。使人先发书，季布果大怒，待曹丘。曹丘至，即揖季布曰：“楚人谚曰‘得黄金百，不如得季布一诺’，足下何以得此声于梁楚间哉？且仆楚人，足下亦楚人也。仆游扬足下之名于天下，顾不重邪？何足下距仆之深也！”季布乃大说，引入，留数月，为上客，厚送之。季布名所以益闻者，曹丘扬之也。

①【集解】孟康曰：“招，求也。以金钱事权贵，而求得其形势以自炫耀也。”文颖曰：“事权贵也。与通势，以其所有辜较，请托金钱以自顾。”【索隐】义如孟康、文颖所说。辜较音姑角。【正义】言曹丘生依倚贵人，用权势属请，数求他人。顾钱，赏金钱也。②【集解】徐广曰：“《汉书》作‘赵谈’，司马迁以其父名谈，故改之。”③【集解】张晏曰：“欲使窦长君为介于布，请见。”

季布弟季心^①，气盖关中，遇人恭谨，为任侠，方数千里，士皆争为之死。尝杀人，亡之吴，从袁丝^②匿。长事袁丝，弟畜灌夫、籍福之属。尝为中司马^③，中尉郅都不敢不加礼。少年多时时窃籍其名^④以行。当是时，季心以勇，布以诺，著闻关中。

①【集解】徐广曰：“一作‘子’。”②【索隐】盎字丝。

③【集解】如淳曰：“中尉之司马。”【索隐】《汉书》作“中尉司马”。④【索隐】籍音子亦反。

季布母弟丁公^①，为楚将。丁公为项羽逐窘高祖彭城西，短兵接，高祖急，顾丁公曰：“两贤岂相厄哉！”于是丁公引兵而还，汉王遂解去。及项王灭，丁公谒见高祖。高祖以丁公徇军中，曰：“丁公为项王臣不忠，使项王失天下者，乃丁公也。”遂斩丁公，曰：“使后世为人臣者无效丁公！”

①【集解】晋灼曰：《楚汉春秋》云薛人，名固。【索隐】案：谓布之舅也。

栾布者，梁人也。始梁王彭越为家人时^①，尝与布游。穷困，赁佣于齐，为酒人保^②。数岁，彭越去之巨野中为盗，而布为人所略卖，为奴于燕。为其家主报仇，燕将臧荼举以为都尉。臧荼后为燕王，以布为将。及臧荼反，汉击燕，虏布。梁王彭越闻之，乃言上，请赎布以为梁大夫。

①【索隐】谓居家之人，无官职也。②【集解】《汉书音义》曰：“酒家作保佣也。可保信，故谓之保。”

使于齐，未还，汉召彭越，责以谋反，夷三族。已而枭彭越头于雒阳下，诏曰：“有敢收视者，辄捕之。”布从齐还，奏事彭越头下，祠而哭之。吏捕布以闻。上召布，骂曰：“若与彭越反邪？吾禁人勿收，若独祠而哭之，与越反明矣。趣烹^①之。”方提趣^②汤，布顾曰：“愿一言而死。”上曰：“何言？”布曰：“方上之困于彭城，败荥阳、成皋间，项王所以不能遂西，徒以彭王居梁地，与汉合纵苦楚也。当是之时，彭王一顾，与楚则汉破，与汉而楚

破。且垓下之会，微彭王，项氏不亡。天下已定，彭王剖符受封，亦欲传之万世。今陛下一征兵于梁，彭王病不行，而陛下疑以为反，反形未见，以苛小^③案诛灭之，臣恐功臣人人自危也。今彭王已死，臣生不如死，请就烹。”于是上乃释布罪，拜为都尉。

①【索隐】上音促，下音普盲反。谓疾令赴钁也。②【集解】徐广曰：“一作‘走’。”【索隐】上音啼，下音趋。徐广云一作“走”，走亦趣向之也。③【集解】徐广曰：“小，一作‘峭’。”

孝文时，为燕相，至将军。布乃称曰：“穷困不能辱身下志，非人也；富贵不能快意，非贤也。”于是尝有德者厚报之，有怨者必以法灭之。吴楚反时，以军功封俞侯^①，复为燕相。燕齐之间皆为栾布立社，号曰栾公社。

①【集解】徐广曰：“击齐有功也。”

景帝中五年薨。子贲嗣，为太常，牺牲不如令，国除。

太史公曰：以项羽之气，而季布以勇显于楚，身屡军^①搴旗者数矣，可谓壮士。然至被刑戮，为人奴而不死，何其下也！彼必自负其材，故受辱而不羞，欲有所用其未足也，故终为汉名将。贤者诚重其死。夫婢妾贱人感慨而自杀者^②，非能勇也，其计画无复之耳^③。栾布哭彭越，趣汤如归者，彼诚知所处^④，不自重其死。虽往古烈士，何以加哉！

①【集解】徐广曰：“屡，一作‘屢’，一曰‘覆’。”驷案：孟康曰“屢，履蹈之也”。瓚曰“屢，数也”。【索隐】身屡军。按：徐氏云一作“覆”，按下云“搴旗”，则“覆军”为是，胜于“屢”之与“履”。②【集解】徐广曰：“或作‘概’字，音义同。”③【集解】徐广曰：“复，一作冀。”④【集解】如淳

曰：“非死者难，处死者难。”

【索隐述赞】

季布、季心，有声梁、楚。百金然诺，十万致距。出守河东，股肱是与。栾布哭越，犯禁见虏。赴鼎非冤，诚知所处。

袁盎 晁错

袁盎^①者，楚人也，字丝。父故为群盗，徙处安陵。高后时，盎尝为吕禄舍人。及孝文帝即位，盎兄吮任盎为中郎^②。

①【索隐】音如《周礼》“盎齐”，乌浪反。②【集解】如淳曰：“盎为兄所保任，故得为中郎。”

绌侯为丞相，朝罢趋出，意得甚。上礼之恭，常自送之^①。袁盎进曰：“陛下以丞相何如人？”上曰：“社稷臣。”盎曰：“绌侯所谓功臣，非社稷臣，社稷臣主在与在^②，主亡与亡^③。方吕后时，诸吕用事，擅相王，刘氏不绝如带。是时绌侯为太尉，主兵柄，弗能正。吕后崩，大臣相与共畔诸吕，太尉主兵，适会其成功，所谓功臣，非社稷臣。丞相如有骄主色。陛下谦让，臣主失礼，窃为陛下不取也。”后朝，上益庄^④，丞相益畏。已而绌侯望袁盎曰^⑤：“吾与而兄善，今儿廷毁我！”盎遂不谢。

①【集解】徐广曰：“自，一作‘目’。”②【集解】如淳曰：“人主在时，与共治在时之事。”【索隐】按：如淳云“人主在时，与共理在时之事”也。③【集解】如淳曰：“不以主亡而不行其政令。”【索隐】如淳云“不以人主亡而不行其政令”。按：如说为得。④【索隐】庄，严也。⑤【正义】望，怨也。

及绛侯免相之国，国人上书告以为反，征系请室^①，宗室诸公莫敢为言，唯袁盎明绛侯无罪。绛侯得释，盎颇有力。绛侯乃大与盎结交。

①【集解】《汉书》作“请室”。应劭曰：“请室，请罪之室，若今钟下也。”如淳曰：“请室，狱也，若古刑于甸师氏也。”

淮南厉王朝，杀辟阳侯，居处骄甚。袁盎谏曰：“诸侯大骄必生患，可适削地。”上弗用。淮南王益横。及棘蒲侯柴武太子谋反事觉，治，连淮南王，淮南王征，上因迁之蜀，轜车传送。袁盎时为中郎将，乃谏曰：“陛下素骄淮南王，弗稍禁，以至此，今又暴摧折之。淮南王为人刚，如有遇雾露行道死，陛下竟为以天下之大弗能容，有杀弟之名，奈何？”上弗听，遂行之。

淮南王至雍，病死，闻，上辍食，哭甚哀。盎入，顿首请罪。上曰：“以不用公言至此。”盎曰：“上自宽，此往事，岂可悔哉！且陛下有高世之行者三，此不足以毁名。”上曰：“吾高世行三者何事？”盎曰：“陛下居代时，太后尝病，三年，陛下不交睫，不解衣，汤药非陛下口所尝弗进。夫曾参以布衣犹难之，今陛下亲以王者修之，过曾参孝远矣。夫诸吕用事，大臣专制，然陛下从代乘六乘传驰不测之渊^①，虽贲育之勇^②不及陛下。陛下至代邸，西向让天子位者再，南面让天子位者三。夫许由一让，而陛下五以天下让，过许由四矣。且陛下迁淮南王，欲以苦其志，使改过，有司卫不谨，故病死。”于是上乃解，曰：“将奈何？”盎曰：“淮南王有三子，唯在陛下耳。”于是文帝立其三子皆为王。盎由此名重朝廷。

①【集解】瓚曰：“大臣共诛诸吕，祸福尚未可知，故曰不测也。”

②【集解】孟康曰：“孟贲、夏育，皆古勇者也。”【索

隐】贲，孟贲；育，夏育也。《尸子》云“孟贲水行不避蛟龙，陆行不避兕虎”。《战国策》曰“夏育叱呼骇三军，身死庸夫”。高诱曰“育为申繻所杀”。贲音奔也。

袁盎常引大体慷慨。宦者赵同^①以数幸，常害袁盎，袁盎患之。盎兄子种为常侍骑^②，持节夹乘，说盎曰^③：“君与斗，廷辱之，使其毁不用。”孝文帝出，赵同参乘，袁盎伏车前曰：“臣闻天子所与共六尺舆者，皆天下豪英。今汉虽乏人，陛下独奈何与刀锯余人载！”于是上笑，下赵同。赵同泣下车。

①【集解】徐广曰：“《汉书》作‘谈’字。”②【索隐】案：《汉旧仪》云“持节夹乘舆车骑从者云常侍骑”。③【集解】徐广曰：“说，一作‘谋’。”

文帝从霸陵上，欲西驰下峻阪。袁盎骑，并车揽辔。上曰：“将军怯邪？”盎曰：“臣闻千金之子坐不垂堂^①，百金之子不骑衡^②，圣主不乘危而徼幸。今陛下骋六驂^③，驰下峻山，如有马惊车败，陛下纵自轻，奈高庙、太后何？”上乃止。

①【索隐】案：张揖云“恐檐瓦堕中人”。或云临堂边垂，恐堕坠也。②【集解】徐广曰：“一作‘行’。”驷案：服虔曰“自惜身，不骑衡”。如淳曰“骑，倚也。衡，楼殿边栏楯也”。韦昭曰“衡，车衡”。【索隐】张晏云“衡木行马也”。如淳云“骑音于岐反。衡，楼殿边栏楯也”。韦昭云“衡，车衡也。骑音倚，谓跨之”。按：如淳之说为长。案：《纂要》云“宫殿四面栏，纵者云槛，横者云楯”也。③【集解】如淳曰：“六马之疾若飞。”

上幸上林，皇后、慎夫人从。其在禁中，常同席坐。及坐，郎署长布席^①，袁盎引卻慎夫人坐^②。慎夫人怒，不肯坐。上亦怒，起，入禁中。盎因前说曰：“臣闻尊卑

有序则上下和。今陛下既已立后，慎夫人乃妾，妾主岂可与同坐哉！适所以失尊卑矣。且陛下幸之，即厚赐之。陛下所以为慎夫人，适所以祸之。陛下独不见‘人彘’乎^③？”于是上乃说，召语慎夫人。慎夫人赐盎金五十斤。

①【正义】苏林云：“郎署，上林中直卫之署。”②【集解】如淳曰：“盎时为中郎将，天子幸署，豫设供帐待之，故得卻慎夫人坐。”③【集解】张晏曰：“戚夫人。”

然袁盎亦以数直谏，不得久居中，调为陇西都尉^①。仁爱士卒，士卒皆争为死。迁为齐相。徙为吴相，辞行，种谓盎曰：“吴王骄日久，国多奸。今苟欲劾治，彼不上书告君，即利剑刺君矣。南方卑湿，君能日饮，毋何，时说王曰毋反而已。如此幸得脱。”盎用种之计，吴王厚遇盎。

①【集解】如淳曰：“调选。”

盎告归，道逢丞相申屠嘉，下车拜谒，丞相从车上谢袁盎。袁盎还，愧其吏，乃之丞相舍上谒，求见丞相。丞相良久而见之。盎因跪曰：“愿请间。”丞相曰：“使君所言公事，之曹与长史掾议，吾且奏之；即私邪，吾不受私语。”袁盎即跪说曰：“君为丞相，自度孰与陈平、绛侯？”丞相曰：“吾不如。”袁盎曰：“善，君即自谓不如。夫陈平、绛侯辅翼高帝，定天下，为将相，而诛诸吕，存刘氏；君乃为材官蹶张，迁为队率，积功至淮阳守，非有奇计攻城野战之功。且陛下从代来，每朝，郎官上书疏，未尝不止辇受其言，言不可用置之，言可受采之，未尝不称善。何也？则欲以致天下贤士大夫。上日闻所不闻，明所不知，日益圣智；君今自闭钳天下之口而日益愚。夫以圣主责愚相，君受祸不久矣。”丞相乃再拜曰：“嘉鄙野人，

乃不知，将军幸教。”引入与坐，为上客。

盎素不好晁错，晁错所居坐，盎去；盎坐，错亦去：两人未尝同堂语。及孝文帝崩，孝景帝即位，晁错为御史大夫，使吏案袁盎受吴王财物，抵罪，诏赦以为庶人。

吴楚反，闻，晁错谓丞史曰^①：“夫袁盎多受吴王金钱，专为蔽匿，言不反。今果反，欲请治盎宜知计谋。”丞史曰：“事未发，治之有绝^②。今兵西向，治之何益！且袁盎不宜有谋^③。”晁错犹与未决。人有告袁盎者，袁盎恐，夜见窦婴，为言吴所以反者，愿至上前口对状。窦婴入言上，上乃召袁盎入见。晁错在前，及盎请辟人赐间，错去，固恨甚。袁盎具言吴所以反状，以错故，独急斩错以谢吴，吴兵乃可罢。其语具在《吴事》中。使袁盎为太常，窦婴为大将军。两人素相与善。逮吴反，诸陵长者长安中贤大夫争附两人，车随者日数百乘。

①【集解】如淳曰：“《百官表》御史大夫有两丞。丞史，丞及史也。”②【集解】如淳曰：“事未发之时治之，乃有所绝。”【索隐】案：谓有绝吴反心也。③【集解】如淳曰：“盎大臣，不宜有奸谋。”

及晁错已诛，袁盎以太常使吴。吴王欲使将，不肯。欲杀之，使一都尉以五百人围守盎军中。袁盎自其为吴相时，有从史尝盗爱盎侍儿^①，盎知之，弗泄，遇之如故。人有告从史，言“君知尔与侍者通”，乃亡归。袁盎驱自追之，遂以侍者赐之，复为从史。及袁盎使吴见守，从史适为守盎校尉司马，乃悉以其装赍置二石醇醪，会天寒，士卒饥渴，饮酒醉，西南陬卒皆卧，司马夜引袁盎起，曰：“君可以去矣，吴王期旦日斩君。”盎弗信，曰：“公何为者？”司马曰：“臣故为从史盗君侍儿者。”盎乃惊谢